

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 252082 24 St
Zenica, 15.07.2025. godine

Općinski sud u Zenici, stečajna sutkinja Sanja Pavlić, u stečajnom postupku koji je pokrenut po prijedlogu predlagatelja BENI BEST d.o.o. Kakanj, ul. 311 Lahke brigade b.b., Kakanj, koga zastupa punomoćnik Ejub Spahić advokat iz Kakanja, za provođenje stečajnog postupka nad navedenim privrednim društvom kao protupredlagateljem, nakon provedenog ročišta 11.07.2015. godine, kome su prisustvovali punomoćnik predlagatelja i protupredlagatelja Ejub Spahić, advokat iz Kakanja i privremeni stečajni upravitelj Muamer Pašalić, MBS: 43-01-0247-18, odlučujući o prijedlogu stečajnog dužnika, donio je van ročišta 15.07.2025. godine:

R J E Š E N J E

OTVARA SE STEČAJNI POSTUPAK nad imovinom stečajnog dužnika BENI BEST d.o.o. Kakanj, ul. 311 Lahke brigade b.b., Kakanj, MBS: 43-01-0637-14, JIB: 4218867690000, glavni račun stečajnog dužnika otvoren kod BosnaBabk International d.d. Sarajevo broj: 1413575320005339, 15.07.2025. godine u 15:00 sati.

Za stečajnog upravitelja, sa liste stečajnih upravitelja, imenuje se Muamer Pašalić, Ćire Truhelke 8 C, Zenica.

Pozivaju se vjerovnici da u roku od 30 dana od dana objave ovog rješenja u „Službenim novinama“ Federacije BiH, prijave svoje tražbine koje imaju prema stečajnom dužniku podnošenjem prijave Općinskom sudu Zenica na broj: 43 0 St 252082 24 St uz uplatu sudske takse u iznosu od 1% od vrijednosti tražbine, ali ne manje od 50,00 KM, niti više od 10.000,00 KM na račun budžeta ZE-DO kantona broj:134-010-0000001672, vrsta prihoda 722221, budžetska organizacija 1606001, općina 103.

Podnositelji prijave uz prijavu trebaju navesti svoju firmu, sjedište, boravište, pravni osnov i iznos tražbine, kao i broj svog računa kod poslovne banke.

Pozivaju se vjerovnici da stečajnog upravitelja u roku od 30 dana obavijeste koja prava osiguranja potražuju na predmetima i imovini stečajnog dužnika, navođenjem predmeta nad kojim se potražuje pravo osiguranja, vrstu i razlog nastanka prava osiguranja, kao i osiguranu tražbinu.

Pozivaju se dužnici stečajnog dužnika da svoje obveze bez odlaganja izmire.

Nalaže se stečajnom dužniku i trećim osobama da stečajnom dužniku predaju u posjed imovinu i dokumentaciju stečajnog dužnika koja je u njihovom posjedu.

Nalaže se registru poslovnih subjekata ovog suda da uz firmu ili naziv stečajnog dužnika izvrše upis oznake „u stečaju“, a u rubrici „Lica ovlaštena za zastupanje subjekta upisa“ umjesto imena i prezimena direktora, upis imena i prezimena stečajnog upravitelja.

Nalaže se zemljišnoknjižnim uredima i nadležnim katastarskim operatima, kod kojih se vode nekretnine stečajnog dužnika, da izvrše upis rješenja o otvaranju stečajnog postupka.

Ispitno i izvještajno ročište u ovom postupku zakazuje se za 14.10.2025. godine u 12,00 sati, u zgradi Općinskog suda Zenica, te se na isto pozivaju vjerovnici stečajnog dužnika koji podnesu prijavu tražbine, kao i stečajni upravitelj.

Rješenje o otvaranju stečajnog postupka objaviti će se na oglasnoj tabli suda, web stranici suda-elektronskoj tabli suda, na internet stranici FIA-e, a u „Službenim novinama“ Federacije BiH objaviti će se izreka rješenja.

O b r a z l o ž e n j e

Društvo BENI BEST d.o.o. Kakanj, ul. 311 Lahke brigade b.b., Kakanj, koga zastupa punomoćnik Ejub Spahić advokat iz Kakanja, podnijelo je prijedlog za otvaranje stečajnog postupka 16.10.2024. godine.

Punomoćnik predlagatelja je na ročištu izjavio da u cijelosti ostaje kod prijedloga za otvaranje stečajnog postupka.

Privremeni stečajni upravitelj Muamer Pašalić iz Zenice je u vezi sa ispunjavanjem uvjeta za otvaranje stečajnog postupka nad imovinom stečajnog dužnika sačinio Izvještaj od 27.03.2025.godine, te je na ročištu za ispitivanje uvjeta za otvaranje stečajnog postupka održanom 11.07.2025. godine izjavio da u cijelosti ostaje kod Izvještaja i svih navoda, zaključaka, te mišljenja, da na osnovu iskazanih finansijskih vrijednosti u bilansu stanja i uspjeha na dan 15.10.2024. godine, društvo ima evidentiranu imovinu, da obaveze u iskazane u bilansu stanja na dan 15.10.2024. godine iznose 167.940,00 KM, dok prema Potvrdi iz BBI Banke dugovanja iznose: 309.795,73 KM i imaju tendenciju stalnog rasta. Naveo je da društvo ima otvoren jedan račun u BBI banci koji je blokiran 16.08.2024 godine. Privremeni stečajni upravitelj je dalje naveo da društvo ne obavlja svoju registriranu djelatnost, niti ima mogućnosti da se poslovanje može nastaviti, da je prijedlog za otvaranje stečajnog postupka na osnovu dokumentacije iz spisa i naknadno pribavljene dokumentacije, pokrenut u pisanoj formi od strane zakonskog zastupnika. Privremeni stečajni upravitelj je naveo da gruba procjena imovine-robe i opreme iznosi cca 50.000,00 KM, te da se radi se o robi široke potrošnje: deterdženti, sapuni, te druga roba koja se nalazi na fotografijama koje su sastavni dio izvještaja, a tačnu vrijednost robe utvrdit će procjenom po vještaku odgovarajuće struke o čemu će obavijestiti sud.

Naveo je da kako imovina stečajnog dužnika postoji i dovoljna je za pokriće troškova stečajnog postupka, to su ispunjeni uvjeti da stečajni sud otvori stečajni postupak koji će se provoditi u skladu sa zakonom. Također je istakao da je prijedlog za otvaranje stečajnog postupka podnesen u zakonskom roku.

Na osnovu prikupljenih informacija, utvrđenog stanja i konstatiranih činjenicu navedenih u Nalazu, privremeni stečajni upravitelj je dao sljedeće mišljenje: Društvo ima imovine koju je privremeni stečajni upravitelj uredno obezbjeđivao i o kojoj se starao, društvo ostvaruje negativan finansijski rezultat, gubici u poslovanja se kumuliraju kao i obaveze, uz činjenicu da društvo ne može izmiriti nikakve obaveze, ostvarili su se zakonski razlozi za otvaranje stečajnog postupka. Naveo je da je razlog za otvaranje stečajnog postupka platežna nesposobnost jer je pravilo da je društvo platežno nesposobno ako u neprekidnom trajanju od 60 dana ne izmiruje svoje dospjele obaveze, a prijedlog za pokretanje stečajnog postupka podnesen je 15.10.2024. godine od strane ovlaštenog predlagatelja tj. Zakonskog zastupnika i podnesen je u zakonskom roku. Privremeni stečajni upravitelj je u pogledu uvjeta iz člana 100. Zakona o stečaju (troškovi stečajnog postupka), mišljenja da se troškovi stečajnog postupka mogu namiriti iz imovine koja bi spadala u stečajnu masu, a radi se o robi čija je vrijednost iskazana prema Bilansu stanja u iznosu od 1.362.849,00 KM.

Također je izjavio i da postoji evidentirano potraživanje, a na koje je Uprava za indirektno oporezivanje ukazala svojim podneskom od 11.03.2025. godine, prema kojem društvo ima upisanu hipoteku nad imovinom društva DC Kakanj d.o.o. Kakanj i to na osnovu Sporazuma o priznanju duga i isplati dugovanja koja je notarski ovjerena isprava od strane notara Babić Emire iz Kaknja, a za koje potraživanje je u z.k. ul. 1548 K.O. Doboju, u C teretnom listu upisana zabilješka, na parceli broj: 730/1, kuća i zgrada, dvorište površine 510 m², a koji Sporazum o priznanju duga i isplati dugovanja br. OP-IP-849/2021. od 04.10.2021. godine, Zemljišno-knjižni izvadak, broj: 1548 i Aktuelni Izvod iz sudskog registra broj: 043-0-RegZ-25-001975 od 17.06.2025. godine, ulaže u spis suda.

Stečajni sud je nakon ocjene svih dokaza priloženih uz prijedlog, te Izvještaja privremenog stečajnog upravitelja, utvrdio da je prijedlog dopušten, da postoji stečajni razlog i da će imovina stečajnog dužnika prema predviđanju biti dovoljna da pokrije troškove stečajnog postupka, te dio tražbina vjerovnika.

Sud je pored navedenog ovim rješenjem odredio dan i sat otvaranja postupka, imenovao stečajnog upravitelja sa liste stečajnih upravitelja, pozvao vjerovnike stečajnog dužnika da prijave tražbine i vjerovnike sa pravom osiguranja da obavijeste stečajnog upravitelja o svom pravu, te dužnike stečajnog dužnika da bez odlaganja izmire svoje tražbine, te je odredio i dan i sat za koji je zakazano ispitno i izvještajno ročište, a sve u skladu sa odredbama čl. 104., 105., 106., 107. i 108., Zakona o stečaju (Sl. Novine F BiH 53/21), budući da je naprijed navedeno i potrebno da sadrži rješenje o otvaranju stečajnog postupka.

PRAVNA POUKA

Protiv ovog rješenja stečajni dužnik može uložiti žalbu u roku od 8 (osam) dana po prijemu rješenja Kantonalnom sudu Zenica, putem ovog suda.

Stečajna sutkinja

Sanja Pavlić